



李忠定公文集
奏議

DS
751
L48A2
1705
v.5



玉
舫
覽

EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5



宋李忠定公奏議選卷之七

明

完桐左光先羅

宗人李春熙編如輯

宋 李綱伯紀著

宗裔李嗣玄評定

宗後學李榮英重訂

議巡幸第一劄子

臣以愚陋、誤蒙聖恩、擢任宰相、初對之日、嘗以巡幸
之議、冒瀆天聽、其意謂京師初經殘破之後、理難固
守、然車駕不可不一到、以慰天下之心、然後鑾輿順
動、然後建狩之禮、以行四方、西則關中、南則襄陽、



宋李忠定公奏議選卷之七

明

皖桐左光先羅



宗人李春熙皞如輯

宋 李綱伯紀著

宗裔李嗣立評定

宗後學李榮英芳重訂

議巡幸第一劄子

臣以愚陋、誤蒙聖恩、擢任宰相、初對之日、嘗以巡幸之議、冒瀆天聽、其意謂京師初經殘破之後、理難固守、然車駕不可不一到、以慰天下之心、然後鑾輿順動、法古巡狩之禮、以行四方、西則關中、南則襄陽、東

李忠

奏議

卷之七

則建康以天下形勝之勢觀之、關中爲上、襄陽次之。
建康爲下。伏蒙睿慈、特採其議、已降指揮京師、催促
修城、祇備謁款宗廟、而未興襄陽建康、皆令葺治宮
室、以俟翠華之幸、臣累留身奏事、論及天下利害安
危所係之大者、未嘗不以此爲言、嘗蒙宣諭、但欲先
迎奉元祐太后、及遷六宮如建康、并禁衛家屬、願遷
徙者、亦津遣南去、而車駕獨留中原、選將屯兵、以衛
行在、雖關中可往、雖金人可戰、臣竊仰陛下英睿果
斷如此、雖古創業中興之主、如漢之高祖、光武、唐之
太宗、不是過也、昨日忽被手詔宣諭、京師未可往、而

欲爲太王避狄之計、巡幸東南、擇形勝之便利、遠水火之焚溺、來春還闕、聚糧屯兵、爲守禦攻討之計、令臣條具合措置事務以聞、臣伏讀愕然、未喻聖意、不知聖慮與前不同、果以爲當如此耶、將左右大臣密獻此說、姑從其策耶、如天慮果以爲當如此、臣竊以爲未然、如左右大臣密獻此說、則臣竊歎其未嘗深思遠慮、姑欲脫一時之患、而不知禍亂之在後也、夫京師宗廟所在、陛下卽位之初、禮當一到、徒以城池之修未備、而防秋之期已迫、勢有未可往者、臣固不敢力爭、至於巡幸東南以避狄、則臣不知車駕果將

安之耶、若欲出於下策、遂往建康、則臣恐天下之勢
傾、而中原不復爲我有矣、請爲陛下試詳言之、夫陝
西者、中國勁兵健馬之區也、河北河東者、中國之屏
蔽也、京畿及東西中國之腹心也、河淮荆湖閩浙川
廣者、中國之支派也、今與隣國爭屏蔽之地、不能保
腹心、以號召勁兵健馬、與之馳逐、而欲自竄於支派
之鄉、臣恐天下之勢、偏而不舉、胡騎深入、號令不行、
州郡莫相救援、皆將碎於賊手、虜以精兵、驚擾京東、
控制淮楚、陛下雖欲還闕、不可得矣、况欲屯兵聚糧、
議攻守計、以迎二聖哉、王命不通、盜賊蠡起、殺害官

議論南
河足為
千石龜
鑑

吏。屠陷城邑。如今之河北。兵民不待金人。然後為害。自江以南。皆當搖動。不知獻策之臣。果能保其必守乎。夫江之廣不如河。江之險不如河。江之湍激不如河。金人渡河。猶不能禦。江豈可恃。而南人之輕脆。非北人之比。賊至則潰。南方之城壁。非北方比。賊攻則破。陛下必以幸建康為安。臣愚竊以為過矣。夫利在耳目之前。患在一世之後。中智以上。乃能知之。今欲乘舟順流而東。其安便比于鞍馬之間。何啻相百。遠幸江湖之濱。其開適比于兵革之際。何啻相萬。然偷取一時安適。而忘禍患之在後。獻說者如此。臣愚竊

以爲不思之甚矣。爲今之計。縱未能行上策。以趨關中。莫若取其次策。以適襄鄧。襄陽近爲李孝忠所據。雖已潰散。恐或殘毀。惟鄧可以脩車駕之時巡。夫鄧者。古之南陽。光武之所興也。西隣關陝。可以召兵。北近京畿。可以遣援。南通巴蜀。可取貨財。東達江淮。可運穀粟。有高山峻嶺。可以控扼。有廣土寬城。可以屯重兵。民風號爲淳古。盜賊未嘗侵犯。此誠天設以待陛下之臨幸。事之機會。不可失也。願詔守臣。增修城池。漕臣儲峙糧草。朝廷給降錢帛。廣行應副。專遣使者以督其事。將來秋高。六飛啓行。由陳蔡唐以趨南。

陽。不過半月可達。天下之士。知陛下之不忍棄中原也。河東之民。知陛下之不遠徙也。天下郡縣。知陛下之處中以臨四方也。皆當心服而無解體之患。是一幸。南陽則三者皆得。一幸。建康則三者皆失。利害安危之幾。在此一舉。陛下何憚而不行也。臣愚伏望聖慈。斷自淵衷。從臣之言。勿主先入之說。天下不勝幸甚。

自古創業中興之主。起于西北。則足以并東南。起于東南。則不足以并西北。此自然之勢也。獨我太祖起東南。而混一西北。則以胡運方衰。陳張諸勍敵。皆在東南。東南舉則移兵西北。猶振籜耳。此時勢不同。非所論于方張之金虜也。舍西北勁兵健馬之地。而自竄于

江海柔脆之鄉。其不振固宜。且河北河東兩路軍民爲中國死守。宋弃之若遺。使兩路之民疾視本朝。其爲虜用。汪黃諸奸偷一時之安。而遺莫大之患。此亦千古籌國之炯鑒矣。

○議巡幸第二劄子

臣已具劄子論車駕巡幸京師城壁修葺未脩未可保守當權時之宜駐蹕南陽據天下之中以號令四方不宜東幸建康棄置中原以失天下之心伏蒙聖慈令與執政同議然前疏未盡區區之意敢昧死再陳之臣聞自昔人主當草昧艱難之時或與英雄角逐或爲夷狄所侵皆據地利而莫肯先退盡人力而莫肯先屈夫勝天下者必以勢而據地利莫肯先退

者○勢○也○蓋○天○下○者○必○以○氣○而○盡○人○事○莫○肯○先○屈○者○氣○也○漢○高○祖○與○項○羽○戰○於○滎○陽○成○臯○間○相○持○累○年○高○祖○雖○屢○敗○不○肯○退○尺○寸○地○既○割○鴻○溝○羽○引○而○東○遂○有○垓○下○之○亡○曹○操○與○袁○紹○戰○于○官○渡○操○雖○兵○莠○糧○乏○不○肯○解○去○既○焚○紹○輜○重○紹○引○而○歸○遂○喪○河○北○由○此○觀○之○與○勅○敵○爭○勝○負○豈○可○不○據○天○下○之○勢○而○先○自○退○哉○唐○之○初○突○厥○頡○利○以○數○萬○騎○飲○馬○渭○水○去○長○安○纔○數○十○里○太○宗○以○七○騎○臨○渭○上○與○語○以○大○義○折○之○既○而○王○師○大○集○旌○旗○戈○甲○光○彩○精○明○頡○利○震○怖○遂○以○請○和○本○朝○景德○中○契○丹○以○數○十○萬○寇○澶○淵○真○宗○渡○河○親○征○射○殺○所○

謂統軍撻攬者虜主惶懼遂亦請和而去。兩朝盟好凡百餘年。由此觀之。爲夷狄所侵。豈可不作天下之氣。而先自屈哉。今金人雖號爲勍敵。其寔皆中國失策。養之使然。考其兵之強盛。豈能過項籍袁紹。其敢深入。豈能過頡利契丹。而吾方其未至之時。已相與震怖。委棄中原。而自竄于江湖之間。旣失天下之勢。又索天下之氣。不知虜騎果復渡河。攻圍我城邑。屠戮我人民。以精兵控扼淮泗。而王命爲之不通。盜賊蠭起。所在竊發。跨州連邑。自相建置。將何以待之。且今之所恃者兵也。陛下每欲聚西北之兵。十餘萬。日

加訓練。以待親征。睿謀壯矣。旣適建康。不知此兵將
何所用。夫建康水鄉。其土卑濕。其食魚稻。非西北之
兵所利。不產粟麥稗草。土氣多熱。非西北之馬所便。
往年方臘起於江浙。朝廷遣西兵討之。疾病物故者
三之二。而馬之存者無幾。由此觀之。欲聚西北之兵
而適建康。猶資章甫而適越也。惟南陽可爲今冬駐
蹕之計。賴天之休。陛下聖德所感。河北河東兩路兵
民。堅戴宋之心。借使賊敢深入。邀截掩擊。中國得一
勝。則天下之勢壯而氣振矣。然後降親征之詔。率天
下之師。問罪以迎二聖之鑾輿。決有轉危爲安。撥亂

反正之理。在陛下。自強不息。力行之而已。臣備位宰相。不惟仰荷特達之知。思自竭盡萬一。天下之責交歸。謀慮一有不當。何以塞之。伏望聖慈。斷自淵衷。察臣孤忠。勿爲群議所惑。天下不勝幸甚。

鍾伯敬史懷論項羽鴻溝曹操官渡之事。余深歎服。以爲千古用兵不易之論也。不知寔本于此。此書天下不槩見。伯敬從何處得之。豈英雄所見畧同耶。抑公之精誠不容泯沒。其文字或散見于人間。伯敬得之爲枕中之秘耶。

據地利而莫肯先退。盡人力而莫肯先屈。最爲當時對病之藥。尤爲闇君庸臣意中所最苦難之事。宜其格格難入也。李又玄評

乞減上供數。留州縣養兵。禁加耗。以寬民力。劄

子

臣伏以祖宗取於民者有常制。供於國者有常數。州縣寬裕。民力豐饒。而國用足。崇寧大觀以來。興造既多。用度浸廣。于是設法以取之。鹽鈔茶引。類多抑配。和買均糴。無錢可敷。至于宣和之間。有應奉湏索之煩。有燕山免夫之後。物力大屈。人心驚疑。如居風濤。洶洶靡定。靖康之初。降寬大之詔。將與民休息。而兵革未已。調發方興。州縣官吏。不克奉行。徒有虛文。初無寔惠。民之憔悴。幾不聊生。今日國勢人心。比之靖康之初。又不相侔。自非無名之歛。一切罷去。與民更

賦重此
時深可
憂慮

始則失業。不聊生之民。皆將聚爲盜賊。而天下之勢離矣。夫自崇觀以來。增上供之數。而一路州縣。又有養兵。給官吏祿廩之費。用度百出。何自得之。于是常賦之外。加數以取于民。如江東西。湖南北。有至于納加耗米四石。僅能了常賦米一石者。猾胥賊吏。又因緣爲姦。欲民力之不困。何可得也。登寶位赦書。已令勘會上供。增數蠲減。宜於元額以十分之三。留本路養兵。及官吏祿廩之費。受納常賦。依法加耗外。不得輒取。犯者重寘于法。則民被寔惠。而有更生之望矣。國家前此屯兵于畿甸。故歲漕東南金穀。以寔中樞。

比喻恰切

今京畿屯兵。無往日之數。而帥府要郡。養兵之制。與則隨時增減。以足國用。以寬民力。不可緩也。自餘不急之貢。及年例拋買無用之物。皆蠲減。茶鹽不得抑配。糴買先給價錢。如此然後可以爲政。夫民猶魚也。財猶水也。魚恃水以生。民恃財以養。水日汲而至于涸。則魚亡。財日取而至于匱。則民散。故善養魚者。蓄之於陂池深渺之間。善養民者。臨之以寬厚簡易之政。審能行之。則足以得民心。得民心。斯得天心矣。如合聖慈。乞降旨三省。措置條具施行。

乞修茶鹽之法。以三分之一與州縣劄子。

臣聞摘山煮海。天下之利源。而國家經費所賴以給足也。祖宗之時。茶鹽之利在州縣。則州縣豐饒。崇觀以來。茶鹽之利在朝廷。則朝廷富寔。其後悉歸於御府。以爲玩好宴遊錫予之物。則天下利源竭矣。今國勢捨攘如此。州縣匱乏尤甚。而兵革未息。寇難方多。有犒師養兵。修繕戎器之費。賴此幹運。以濟艱危。其勢固未能盡損。以與州縣。然崇尚儉素。因陋就簡。內之掖廷。用度甚夥。外之官吏廩祿。裁減亦微。凡前日無名之費。不急之務。一切無有。則亦不必盡蓄之中都。爲今日之計。莫若損益其法。以通商賈。凡茶鹽之

利以三分之一與州縣。既足以紓州縣之急。又足以給朝廷之用。則內外兼濟。輕重惟均。天下之政事可舉矣。夫王室根本也。州縣枝葉也。王室腹心也。州縣四支也。稿澤肥瘠。通爲一體。然後可爲。况艱難之際。寔賴州縣。協濟國事。州縣不足。重困吾民。此法之所以不可不變通也。如合聖意。乞降旨中書省。措置施行。

乞剗刷官田。倣弓箭刀弩手法。給地養兵。劄子臣聞以不教民戰。是謂棄之。未嘗素教而以之戰。是棄民也。古者兵民不分。無事則爲鄉遂之民。有事則

爲軍旅之士。三時農務。一時講武。少習長安。皆爲精兵。有所不出。出無不勝矣。唐設府衛之兵。頗倣古制。無養兵之費。而有用衆之寔。此良法也。後世兵民旣分。不可復合。惟陝西沿邊弓箭手。及近置湖南刀弩手。猶有古之遺意。其法給田百畝。使家出一人爲兵。自備器甲之屬。官爲收掌。有事則給之。而養馬者又別給五十畝。私自習學武藝。而官以時按閱。其有力者。雖一人係籍。置私名數人。以相夾輔。故弓箭手雄於西邊。捍禦夏人。多賴其力。而刀弩手之法。頗與之相類。亦能鎮服蠻獠。不敢妄動。今東南官田最多。如

所謂戶絕田、逃亡田、天荒田、屯田之類皆是、莫若一切令剗刷、用弓箭刀弩手法、參酌中制、募民爲義勇軍、給地與之、州縣籍其名數、依新軍團結、以時教閱、則數十萬衆、不勞力而可具、假以歲月、皆精兵也。又皆土著、無逃亡潰散之患。最策之得者。如合聖意、乞降旨三省、措置施行、

乞籍陝西保甲京東西弓箭社免支移折變團
結教閱劄子

臣竊以祖宗籍陝西河北河東之民以爲保甲。河北五十餘萬。河東二十餘萬。而陝西之數不下河北。命

提舉官總之。以時教閱。蓋有意寓兵于農也。十餘年來。降指揮。以免教閱。其法遂廢。而保甲不知兵。徒有其名而已。靖康間。臣嘗建議。乞專遣使團結訓練。加詳於舊。與其召兵他路。不若因此用之。爲得策。而朝廷不以爲然。今河北河東之地。旣爲金人之所踐蹂。豪傑強壯。多依山寨。以相保聚。朝廷已置招撫經制司。以撫循經畧之矣。獨陝西保甲。名數尚存。可行措置。然陝西之民。素困於支移折變。宜一切蠲免。而係保甲之籍者。依新法團結。以二千五百人爲一軍。差正副統制官總之。以時訓練。有事藝精者。補以名目。

擢充部隊將之類。則數十萬兵。不日可具。西可以捍
夏戎。北可以禦金寇。非小補也。京東西有弓箭社。亦
皆可倣此推行。如合聖意。乞降旨三省措置。

此時兩河爲金人所躪。岌岌乎及陝西矣。朝廷不籍而用之。必爲金人所有。時勢宜然。否則戶驅人以爲兵。惡在其不擾民也。
李又玄評

論君子小人劄子

臣昨日奏事。論及人主之職在知人。雖堯舜猶以爲
難。誠能別白邪正。使君子小人。不至混淆。然後天下
可爲。伏蒙宣諭。知人亦非難事。但考其素行。則知之。
竊仰聖訓。誠得知人之要。然臣竊謂國家艱難之際。

圖回事業。雖材智兼用。然帷幄腹心。非君子不可。何哉。君子愛君而不謀身。憂國而不謀家。以公忘私。以義忘利。小人則反。此自昔人主信小人而任之。其國未嘗不至于危亡。夫小人豈不欲安存而惡危亡哉。然使之謀人之國。必致于此者。以其無遠見而操術險也。彼方以謀家保身。營利趨私爲得計。於國事恬不知卹。非不知卹也。以謂必不至于危亡。而不知卹也。唐天寶末。楊國忠旣激安祿山叛。以信其言。又促哥舒翰出兵潼關。恐其不利於已。動爲身謀。不顧社稷大計。及遭陳元禮之變。刃加于頸。而後知。蓋亦晚

矣。是其所以求全者。乃所以自族也。范祖禹有言。夫
避害就利者。小人之常也。利于已而不利于人。則爲
之。害於國而不害于家。則爲之。自以爲得計矣。然而
害于國。則亦害于家。不利于人。則亦不利于已。是以
自古小人之敗。必至于家國俱亡而後已。此聖人所
以戒小人之勿用也。然而爲人主者。曷嘗不欲用君
子而退小人哉。卒之君子多不能安其身於朝廷。而
小人常得志者。君子行道直。自信篤。去就輕。好惡正
故也。行道直。則不能阿諛以取容。自信篤。則不能過
防以遠害。去就輕。則不爲爵祿之所累。好惡正。則不

爲奸邪之所喜。自非人主明足以察。誠足以任。則君子雖欲有爲於當世。不可得也。齊小白之任管仲。信而弗疑。此所以成霸業。故曰有人而弗能知。害霸也。知而弗能用。害霸也。用而弗能信。害霸也。信而以小人參之。害霸也。霸猶如此。况欲圖天下之事業。以起中興之功哉。陛下旣得知人之要矣。更願致察于君子小人之間。天下不勝幸甚。

乞罷尚書左僕射第一劄子

臣嘗具誠懇。干冒天聰。以臣智識淺短。議論迂濶。深恐不足以仰副陛下委任責成之意。乞賜罷免。過蒙

聖慈特加慰勞。未從所請。第深感泣。伏念臣愚忝無
取。獨守孤忠。遭遇陛下龍飛之初。特加識擢。起于江
湖之濱。任以揆宰之職。人言紛至。睿斷不疑。特達之
知。曠古無有。臣所以仰戴隆恩。誓以死報。夙夜黽勉。
思竭犬馬之力。以圖尺寸之功。捍禦外艱。銷弭內患。
使中國之威稍振。則二聖之還可期。奉事左右。致復
太平。此臣區區至願也。然而事有與願違者。臣受材
素拙。稟性復疎。材拙則不能適時之變通。性疎則不
能防物之窺伺。加以孤危之跡。冒處寵榮之先。趣操
既已不同。謀議自然各異。誠慮不能上體聖意。協濟

艱難。虛負天下之責。周任有言曰。陳力就列。不能者止。孔子有言曰。所謂大臣者。以道事君。不可則止。臣非不貪戀陛下恩德。欲效涓埃。然力有所不能。道有所不可。則臣豈敢虛負寵榮。久妨賢路。伏望聖慈。特降睿旨。罷臣左僕射兼門下侍郎職事。除一官。觀差遣。或守本官致仕。臣自今月十六日。更不敢供職。俯伏俟命。干冒天威。無任惶恐。激切之至。

使中國之威稍振。則二聖之還可期。此漢太公之所以不請而自歸。我英宗之所以不祈而自至也。不能自強。而徒朝夕請。真虎狼之憐已得乎。李又玄評

乞罷尚書左僕射第二表

臣綱言已具劄子乞罷尚書左僕射兼門下侍郎除
一在外官觀或守本官致仕伏奉詔荅不允者冒貢
忱辭祈歸政柄曲頒溫詔未諒愚衷輒輸肝膽之誠
敢避再三之瀆恩深志激言出涕零謝中臣聞明主用
人進以禮而退以義君子事上用則行而舍則藏矧
當國家艱難之秋尤賴股肱協濟之力苟不勝任其
敢冒居復念臣樸鄙之資不足以適時蹇淺之學不
足以揆事誤蒙識擢付以鈞衡黽勉百爲冀荅丘山
之賜侵尋兩月曾無毫髮之勞愛莫助之慨其嘆矣
經畧遠圖則以爲迂濶廷爭大議則以爲擅專屢嘗

借筋而謀。寔有掣肘之患。譬呼醫而吐藥石。敢言瞑
眩之期。猶敦匠而止斧斤。難任斲削之事。與徒尸素
曷若退休。謹援周任陳力就列之言。仰遵仲尼以道
事君之訓。乞此骸骨。歸于山林。伏望皇帝陛下。照以
離明。運之乾健。策騏驥之逸足。捐樗櫟之散材。則能
否各安其情。用舍兩得其道。愚憊旣不虛任天下之
責。廟畧亦以早致中興之功。茲非飾辭。敢以死請。謹
奉表陳乞以聞。

呼醫而吐藥石。敦匠而止斧斤。二語精工。痛
切。當倥偬戎馬間。諸表駢麗。乃尔。故自難。

乞罷第二表

臣綱言精意格天。未動蓋高之聽。危辭瀝血。願明
奪之心。輕去大恩。非緣細故。敢再陳其懇悃。以必冀
於矜從。謝中臣聞天子之君萬邦。莫先於論相。宰相之
宅百揆。無大于薦賢。方國家多難之秋。尤將帥之材
爲急。所以蕭何之於漢。必薦韓彭。有若杜房之於唐。
亦推英衛。惟天下危而注意。將則四面立而國勢安。
顧兩河之土疆。乃中原之屏蔽。名城堅壘。業薛相望。
高山大川。蟠互交鎖。風氣便用武之習。兵民堅戴宋
之心。因而用之。靡不濟者。隄防修則泛濫自息。藩籬
固則堂奧可寧。機會在于一時。功利收于百倍。力陳

至計。幸契淵衷。創招撫經制之兩司。擇張所傳亮爲
二帥。所建議于靖康之末。得朔部之民情。亮撙戎于
建炎之初。有大將之規畧。皆採衆論。匪徇私心。齋壇
旣登。戎車甫駕。時靡旬日之久。變生心腹之間。樞廷
降旨以沮所者。踰千言。宸翰從中以罷亮者。方寸紙
事同戲劇。人爲嗟咨。而臣備位宰司。誤膺國寄。旣不
能以先見之明。杜讒口。又不能以至誠之意。回天心。
復何面顏。尚叨寵祿。伏望皇帝陛下。虛心體道。公聽
並觀。憫臣謀所當爲。蓋專于報國。察臣去不得已。非
薄于愛君。特許罷於政機。俾得歸於田里。誓堅晚節。

仰荅鴻私。謹再奉表陳乞以聞。

駢儷中有大議論大經濟且敘致自然非大手筆不能
李又玄評

乞罷第三表

臣綱言感激危辭敷陳已極。眷留縉禮當荷尤難。豈進退去就之敢輕。蓋規矩準繩之難合。軒墀將遠涕淚交零。中謝伏念臣一介孤生。兩朝舊物。以腐儒而談軍旅之事。以陋質而充柱石之材。賦分窮奇。始將天厭觸事齟齬。似非人爲。適當雲起龍驤之秋。自謂千載一時之遇。召從江海。畀以機衡。被宸章有忠貫金石之言。奉玉音有氣折夷虜之訓。恃眷知之有素。忽

窺伺而不防。凡所施爲。皆成罪釁。其進銳者。其退速。
物理固然。以譽親者。以毀疎。人情應爾。顧難得者可。
乘之機會。而所惜者已定之規模。豈惟繫宗社之安。
危。蓋亦本生靈之休戚。如臣用舍。何足少多。雖匹夫。
無不獲自盡之功。矧大臣有不可則止之戒。敢言斯。
義。仰冀必從。伏望皇帝陛下。洞照微誠。曲矜深懇。俾。
退避于賢路。以保全于素心。犬馬之戀無窮。徒深踟。
躇。天地之恩難報。終誓糜拍。謹三奉表陳乞。以聞。

難得者可乘之機會。所惜者已定之規模。曠
世讀之。猶增感歎。而高宗不動者何耶。

謝罷相除觀文殿大學士提舉杭州洞霄宮表

臣綱言、伏奉告命、除臣觀文殿大學士、依前銀青光祿大夫、提舉杭州洞霄宮、任便居住者、上還印綬、方虞譴責之嚴、退卽田廬、更冒光華之寵、殊庭優禮、祕殿清資、拜命若驚、拊躬增厲。中謝伏念臣人微學陋、志廣材疎、妄意功名、象龍豈能致雨、潛心文墨、盡餅不足療饑、當艱難多故之秋、被考慎非常之選、代大匠斲、已血指而汗顏、蠟衆俊先、宜擢髮以數罪、念朝廷愛惜寸陰之日、非臣子貪戀寵利之時、與其尸祿而妨賢、不若乞骸而避路、力祈罷免、曲荷矜從、五湖扁舟、雖有慙於范蠡、三宿出晝、猶竊慕於孟軻、孤忠自

憐。大恩難報。此蓋伏遇皇帝陛下。堯仁天覆。湯聖日
濟。審大君操用舍之權。俾微臣全進退之節。情同犬
馬。悲跡遠于華軒。身在山林。終心馳于魏闕。

謝落職依舊官祠鄂州居住表

臣綱言。伏奉告命。落臣觀文殿大學士。依舊銀青光
祿大夫。提舉杭州洞霄宮。鄂州居住者。輔相失職。宜
卽明刑。天地有容。祇從薄責。恩深罪大。感極涕零。中謝

伏念臣乾坤腐儒。閩海冷族。遭朝廷之多故。躐英俊
以登庸。雖懷憂國愛君之心。初無持危扶顛之術。荷
知特達。思圖報于涓埃。謀已濶踈。曾莫虞于機穽。雖

嘗身退。尚致人言。顧涇血安能明心。雖擢髮不足數罪。睿智有察。覆照無私。寬其斧鉞之嚴誅。處以江湖之善地。姑鑄秘職。尚領真祠。此蓋伏遇皇帝陛下。道大堯天。仁深湯網。憐臣寡與。自取顛躋。察臣孤危。本緣愚直。特曲憲章之峻。俾霑餼廩之餘。臣敢不循省前非。益堅素守。軒墀在望。莫施犬馬之勞。恩輝所臨。但傾葵藿之志。

謝移澧州居住表

臣綱言。蒙恩以謫降官。不許同居一州。移澧州居住者。負罪遠屏。去魏闕者再冬。抱疾連年。走江湖者萬

里。僅存殘息。仰荷隆恩。

謝中

伏念臣學不足以爲已。而

欲推之以爲人。謀不足以保身。而欲底之以保國。進
不量其淺薄。退遂致於顛隤。爛額焦頭。何補救焚之
道。跋前疐後。自貽速謗之憂。天地涵容。日月清照。雖
遠從于譴斥。乃曲荷于保全。迨此例遷。猶得善地。此
益伏遇皇帝陛下。以智爲燭。所寶者慈。憐其孤危之
踪。處之深僻之所。尚叨厚祿。以養餘生。臣敢不銘骨
知恩。洗心念咎。情同鳥雀。願依湯網之寬仁。德仰乾
坤。肯慕湘壘之猶介。

宋李忠定公奏議選卷之八

明

皖桐左光先

宗人李春熙

宋李綱伯紀著

筠陽戴國士初士較

宗裔李嗣玄評定

謝差中使傳宣撫問降賜茶藥表

臣綱言、伏蒙聖恩、以臣除荆湖廣南路宣撫使、兼知潭州、特降中使、傳宣撫問、敦遣赴任、賜臣茶藥銀合各一具、臣已望闕謝恩、祇受訖者、久去天墀、徒深葵藿之志。遠迂星使、特頒雨露之恩。祇佩寵光、彌增感

涕臣綱謝中伏念臣一介腐儒三朝舊物荷聖神之知

遇念終始之保全辯醜詆于豺狼當路之時脫餘生
于蛟鰐垂涎之口恩輝厚矣報稱蔑然迨茲命帥以
終戎乃復棄瑕而用舊式頒異數昭示眷私滌煩以
北苑之靈芽捐疾以尚方之妙劑寶奩深貯溫詔誕
敷穆如清風之慰心恍若沉痾之去體夫何孤陋有
此遭逢此蓋伏遇皇帝陛下聖德日躋神心天運公
生明而忠邪自辯道乃久而是非自明故于起廢之
間示之體貌欲使錫命之際知所勸懷臣敢不仰體
皇慈深求民瘼布宣威德庶收藥石之功慰撫烝黎

俾知飢渴之解。願圖尺寸之效。以荅乾坤之私。

具荆湖南北路已見利害奏狀

今具荆湖南北路招捕盜賊、拊循歸業之民、經營控禦、措置錢糧、已見利害于下、

一准福建江西荆湖南北路宣撫使司關、荆湖南路馬友約六萬餘人、馬數千疋、船數千隻、見在潭州、李宏約一萬餘人、見在岳州、曹成約十萬餘人、見在道州、劉忠約一萬餘人、見在岳州、平江、潭州、瀏陽界、出沒作過、胡元奭三千餘人、見在茶陵界上、李冬至餘黨五千餘人、見在郴連

界上、荆湖北路、楊華約一萬人、雷進約八千有
餘人、劉超一萬二千餘人、見在鼎澧州界、已上
約二十餘萬人、其餘接境去處、千百群聚、又不
在此數、盜賊之衆如此、非得重兵、制禦彈壓、使
之畏威、不敢猖獗、然後可以招納爲用、而遽欲
以恩意姑息懷之、臣未見其可也、今福建江西
荆湖宣撫司、臨以重兵、理當聽命、訪聞馬友一
項人馬、卽日見在潭州、視諸處頭項、頗爲循理、
宜先次招納、稍加旌賞、以勸其餘、劉忠一項人
馬、號白羶笠、卽日見在岳鄂潭表諸處界上、屯

洎出沒作過、自知罪大、不能自新、嘗于旗上有
永不伏招安之語、此一項最爲桀黠猖獗、數州
之民、皆被其害、宜先次討蕩、使其餘知所懲創、
胡元奭一項、已爲提刑呂祉會合殺散、劉超一
項、已爲鼎州帥臣程昌禹遣兵逼逐出境、未知
所向、自餘李冬至、鍾相餘黨、楊華、雷進、逐項賊
火、招納討定、當隨宜措置外、惟曹成一項、狡獪
慘酷尤甚、屢招屢叛、所至以人爲糧、靡有噍類、
卽日見已起離道州、侵犯廣西賀州界分、緣廣
南州縣素無城郭、人兵孱弱、深慮乘虛遠引、爲

二廣之患、宜先遣曉事官吏、使齎朝廷所降勅
榜、黃旗金字牌、先去撫諭、示以禍福、許之自新、
如聽伏招納、卽依金字牌上聖旨處分、將所被
虜、及老不堪披帶人、經所屬給據放散外、其寔
堪披帶出戰人、結成隊伍、並聽宣撫司使喚、具
首領姓名推恩外、其首領理須撥隸諸將下、隨
材錄用、不堪披帶出戰、尚堪執役之人、合刺充
廂軍、分隸諸州、其揀選老弱、不堪執役之人、給
公據放散、係東北人、無業可歸、合就近分送州
縣居住、將天荒戶絕拋棄逃亡、係官田土、措置

給與耕種、借貸種糧、務令存恤得所、昔東晉朝
北方流人、皆置僑寓州軍以處之、蓋流人與土
著盜賊不同、放散無所歸、又湏結集爲盜、全藉
州縣官、用心循拊、自當復爲良民、伏乞朝廷更
賜詳酌指揮、其李宏一項、元隸馬友、今已將帶
一行人馬、擅往岳鄂、亦乞依此施行、如不伏招
納、依舊作過、卽乞多發兵將、會合掩殺、以殄滅
爲期、如此則荆湖盜賊、不踰時可定、緣臣所得
聖旨指揮、令相度由廣東前去之任、因令撫定
廣南州軍、見已具奏申明、若自廣南前去、卽荆

湖事無由措置、深慮有失機會、伏望聖慈、特降
睿旨、作朝廷行下、付福建江西荆湖路宣撫司、
密切措置施行、

一 勘會荆湖南北路州縣居民、近年以來、初遭鍾
相孔彥舟作過、遷徙失業、重以馬友曹成李宏
劉忠劉超楊華雷進十數頭項、蹂踐搔擾、民不
聊生、湖南潭衡全邵道永郴桂陽湖北岳鄂鼎
澧并屬縣等、例皆殘破民居、存者百無一二、田
土荒蕪、財谷匱乏、將來盜賊平定之後、若不極
意招集料理、使之歸業、墾闢耕鑿、以望歲豐、則

破殘州縣卒未就緒、欲乞朝廷特降勅、勝曉諭、應歸業之民、委寔曾經兵火、不曾種蒔去處、與免將來冬苗租稅、無力耕種、貧不能自存者、官貸種糧、隨物力等第、約度數目支給、候將來成熟、隨料回納入官、逐州見今起發上供錢絹銀等、委是無從而出、特與權免一次、檢踏田土、支散錢糧、官吏奉行、不得減裂搔擾、重寔干法、務令寔惠及民、使一方曉然知朝廷德意所在、契勘荆湖土地沃衍、最產穀米財物、止緣累年盜賊、失于措置、遂至凋弊、朝廷稍寬目前之急、不

惜賑貸之費、假以歲年、漸次復舊、國用何患不
饒、如合聖意、伏乞特降指揮施行。

一、荆湖之地、綿數千里、南通二廣、西引四川、北控
襄漢、東接江淮、自昔號爲上流、諸葛亮謂之用
武之國、今朝廷保有東南、制御西北、荆湖諸郡
如鼎澧岳鄂、連荆南一帶、皆當屯宿重兵、倚爲
形勢、使四方之號令可通、襄漢之聲援可接、乃
有恢復中興之漸。今福建江西荆湖路宣撫使
司之兵、將來平定盜賊之後、復還行在、臣畫一
內、依所降指揮踏逐、乞兵不滿萬人、若到本路、

兼得岳飛吳全韓京吳錫等兵方及二萬之數
分屯布依、汾江要害去處深慮不足伏望聖慈
許臣候到本路相度形勢圖上方畧別行申請
一契勘荆湖兩路當盜賊兵火之後物力大屈今
來養贍官吏軍馬賑貸歸業之民修治官府城
壁器仗之類百色用度並皆未有指擬朝廷欲
以二廣經理荆湖固爲得策然廣南素號薄瘠
米穀不多財用匱乏加以比年應副朝廷湏索
尤覺困匱借使竭力剗刷所有幾何今又盜賊
未弭道路不通卒未可以那移應副近准尚書

省劄子、許于吉州權貨務、支銀一萬兩、錢一萬貫、此但可以支目前之用、若要支吾年歲間、非于江西鄰近湖南州郡、權宜應副、決不能有濟、伏望聖慈、特降睿旨、令于筠袁虔吉等州、應副米十萬石、于轉運司及吉州權貨務、應副銀五萬兩、錢十萬貫、接續支使、庶幾不致闕誤、右謹錄奏聞、伏望勅旨、

此篇不當以文字論其招撫盜賊、湏壓以重兵、不可遽以恩意懷之、深中今日流寇之病、其分別良悍、以爲招討次第、及分隸強壯、刺充廂軍、放散老弱、安插流人、皆當今良策、至于屯宿重兵于上流要地、使四方之號令、可通襄漢之聲援、可接自是恢復急務、且以荆

湖南北兩路綿亘數千里用兵止二萬人支銀止六萬兩米錢止十萬石貫何厪厪也

再乞招撫曹成奏狀

右臣契勘昨來荆湖群盜唯曹成人數最多曹成侵逼嶺外唯廣州事體最重故今日招捕盜賊先後緩急之序臣謂當以經營曹成救援廣州爲急曹成十萬之衆除老弱婦女外能戰之兵不下三萬今據廣南東路經畧安撫使林通前項申述已侵入本路封連州界若便行進兵掩擊賊必聞風奔衝南向不唯先犯廣州而廣南東西兩路州縣必皆受害臣謂經營曹成軍馬先須招撫爲策之善緣招安巨寇必得

招撫
計
丁巳歲

明末報
撫辱盜
大有子
勢真誠
孫作臣
三言

重兵先張形勢示以國威使之畏伏若止欲懷以姑
息之恩賊衆必不肯投戈解甲分散徒黨如此是目
前名爲招安必貽後日之大患臣請以近事驗之昨
趙延壽未到德安府願從陳規與撫諭官馮轡招安
既近州城覘知德安兵數不多遂乘規出城餞轡輒
謀驅虜規僅以身免官吏多爲延壽所得張琪自繁
昌歷建康湖杭千有餘里必要赴呂頤浩軍前招安
劉光世韓世忠等招之皆不聽命假道徽州不敢入
城秋毫無犯其意可謂確矣及至祁門浮梁見王師
古等兵衆不多遂劫盟以執師古直犯饒州賴閻臯

力戰方退、復領餘黨、猖狂于宣徽之間、父之方定、以
此可見盜賊、狼子野心、叛服無常、要當壓以重兵、始
免反覆、臣蒙恩除荆湖廣南路宣撫使、兼知潭州、見
今止有撥到任仕安一項軍馬、計一千三百餘人、雖
已具奏、遵依近降聖旨、踏逐軍馬、道路窵遠、見今阻
隔、卒難辦集、竊恐遷延日月、賊勢益張、而臣誤蒙委
寄之重、深慮事失機會、若一處帥府失守、益難料理、
乞降睿旨、從臣所乞、踏逐軍馬外、更自朝廷差撥一
軍、整齊兵將、付臣使喚、臣又嘗奏論韓世忠忠勇有
謀、治軍嚴肅、可以倚仗、今若委世忠進發廣東、以援

廣州使臣同共措置招撫、則曹成之衆可以放散老
弱、揀擇強壯、充兵、分隸軍中、指日可定、緣世忠係宣
撫福建江西荆湖路、非得朝廷指揮、恐不敢出本路
界、以援二廣、不唯二廣州縣未甚殘破、速當保全、而
荆湖劇賊皆視曹成以爲叛服、若招撫曹成已定、全
得二廣、則荆湖兩路盜賊、或招或捕、皆易爲力、顧曹
成桀黠、擁衆數萬、非世忠全軍聲勢之壯、未易使之
聽從、臣前所謂當以經營曹成、救援廣州爲急者、此
也、伏望聖慈、詳酌前後奏請、早降睿旨施行、臣見起
發建昌軍等處聽候指揮、

乞依近降指揮乞兵二萬人措置招捕曹成奏
狀

右臣契勘、昨奉聖旨、令相度取道廣東之任、就令撫
定廣東州縣、又據廣東經畧安撫使林通、申曹成侵
犯賀州、及懷集縣、臣已恭依聖訓、起發前去廣東、
措置撫定、緣臣見帶軍馬、止有任仕安一項、計一千
三百餘人、除火頭輜重外、結成隊伍、不滿千人、雖依
朝廷近降指揮、踏逐人兵、並未蒙差到、亦無可決將
官、委是兵力單弱、其曹成賊馬十萬、若不就招撫、爲
岳飛等逼逐、奔突二廣、廣西猶有峒丁、土兵、刀弩手

等可以防遏、廣東將兵孱弱、除廣州外、其餘州郡、並無城壁可守、非得重兵、豈能挫遏賊鋒、保護兩路、況臣誤蒙聖恩、宣撫荆湖廣南、深慮無以遠將明命、宣暢國威、使巨寇望風震服、萬一與賊相遇、勢當掩擊、兵法十則圍之、倍則戰之、今以千兵而當十萬之衆、是以一當百、雖古名將、能以少擊衆、亦難成功、況臣書生、不諳行陣、徒以嘗備位宰相、使之撫定一方、今日職事、動繫國體、與戰將偏師、僥倖一時之利者、自不同科、其所乞之兵、未敢全望、且得萬餘人、分爲五軍、粗成軍容、張大聲勢、鼓行而南、庶幾亦可指受將

抱負亦
大畧可
見真全
才也

佐、乘機制變、施設方畧、保全二廣、仰寬陛下南顧之
憂、若只令臣以任仕安千餘衆、苟且前去、竊恐虛受
重責、伏望聖慈、矜察、特降睿旨、早賜指揮、更自朝廷
差撥一軍整齊兵將、付臣使喚、臣見迤邐前去、聽候
回降指揮、

小帖子

臣契勘樞密院劄子內、備奉聖旨、令福建江西荆
湖宣撫司、斟量賊勢、分撥人馬、策應岳飛、上項所
差兵、合自南雄英韶、前去廣州、稍可捍禦賊馬、保
全廣東、乞降睿旨、令差撥隨逐臣前去、聽受節制、

庶幾藉其兵力、諸事易爲措置、如蒙聖旨、允臣所請、乞用金字牌降下施行、

既付公以荆湖廣南四路重寄、又僅畀兵千餘、其所以遣公之意、謂何公所乞僅萬人、便自許以乘機制變、施設方畧、保全二廣、而所乞之兵、又只就朝廷所遣策應岳侯者、使聽公節制、公所處之時、何其難、而公所望於朝廷者、又何其易耶、李又玄評

經過邵武、軍乞往祖塋展省奏狀、存此以見公爲邵武人也

右臣遵奉聖旨、將帶任仕安所部人馬、前去廣東、撫定州縣、今月二十五日、已入邵武軍界、邵武軍係臣鄉里、有祖塋、去城七里、久不展省、臣已一面措置輜重器甲、爲陸行計、量帶人從、前去祖塋展省、並不相

妨亦無分外留滯日數緣臣見統軍馬合具奏知

展墓亦須奏知赴任經繇之路亦從中制甚矣文法之繁苛也然用兵則失律者不誅士卒逃潰者反以銀絹招集何寬嚴之失體也

李又玄評

到湖南界首謝表

臣綱言伏奉告命除臣觀文殿學士依前左銀青光祿大夫荆湖廣南路宣撫使兼知潭州充湖南路安撫使馬步軍都總管不許辭免內外官司不許收接文字臣已祗受告命遵稟聖訓自福建路起發於今月十一日至衡州茶陵縣入湖南路界交割本路安撫使職事訖者撫楚粵之俗于遐方叨將明命觀天

人之文于祕殿。復與清班。惟寵數之過優。知委任之
難稱。以榮爲愧。感極涕零。中謝竊以荆湖之奧區。寔爲
東南之重地。控引川廣。襟帶江淮。方時承平。爲一都
會。屬夷狄之倣擾。致盜賊之內訌。郡邑凋殘。姦吏因
而漁獵。田疇荒蕪。遺民誰與拊循。宜得信臣。往膺重
寄。如臣者。崎嶇可笑。結約亡奇。徒自信其孤忠。曾莫
著于微效。三朝遭遇。濫叨出將入相之名。七載飄零。
初無防患周身之術。憶昨歸從海上。還處閩中。疾病
交攻。但有餌藥持危之志。血氣傷耗。敢懷據鞍矍鑠
之心。豈謂皇恩。不遺舊物。付以分閫之重任。加以禁

殿之隆名。中使來臨。載傳溫詔。匪頒下逮。祗沐湛恩。不容一再以懇辭。乃爾黽勉以就職。安國久廢。豈死灰復然之敢期。文淵慨懷。必馬革裹尸而後已。此蓋伏遇皇帝陛下。法天御極。體道應時。明原肯以定是非。本何心于用舍。脩政事而攘戎夷。蓋有意于翕張。致茲憂患之餘。亦荷甄收之賜。臣敢不激昂素志。澡澣前非。撫凋瘵以牧善良。宣威靈而戢姦宄。承流宣化。遠希循吏之風。禦侮折衝。更勵虎臣之節。

乞正李宏擅殺馬友典刑奏狀

右臣准樞密院劄子。近據福建江西荆湖南北路宣

此風何可
不戢

撫使司奏、潭州申副總管馬友、自到潭州、擅置刑獄、
枷栲州縣官僚、分遣衙兵、肆行劫掠、殺害良善、無所
不至、又遣本軍官、遍權屬縣、強取錢糧、凌逼知通、跋
扈恣橫、及遣牙兵下村、收捉百姓、蔣暹等、剗刷金銀、
每二十人爲一串、皆透手心、以索貫之、出語不遜、欲
抗拒王師、承武功大夫貴州團練使統制軍馬李宏
公文、承馬友勾請前來、會合收捉劉忠、旣到潭州、卽
無遣兵收劉忠之意、言語大段不順、宏不敢依從、于
六月一日、統兵入城、已將馬友處置訖、除已鈐東軍
兵、不令搔擾、曉示居民安業外、奏聞事、六月二十六

日奉聖旨李宏誠心體國、勦除叛逆、備見忠義、可令
學士院降勅書獎諭、其馬友軍衆、令樞密院給降勅
榜撫諭、差使臣齎送前去、仍仰孟庾韓世忠措置撫
存、將湖南江淮百姓、放令歸業、外將帶堪出戰人馬
隨軍使喚、劄送臣照會、臣竊見拱衛大夫成州團練
使馬友、與李宏皆北來盜賊、犯湖南、占州縣、內馬友
以嘗殺敗孔彥舟、已蒙朝廷勅命、除湖南路副總管、
在潭州駐劄、一年有餘、雖脅制官吏、搔擾百姓、掎聚
錢糧、贍養徒衆、不無過惡、然寔未見有背負朝廷之
迹、李宏陰圖殺害、并誅將佐王成等十數人、却稱馬

友常有不順之語、不敢依從、於六月一日、統兵入城、已將馬友處置訖、旣無證佐、事理難明、設使馬友有不順言語、及諸般過惡、近則有福建等路宣撫司、見在吉州、遠則有朝廷、皆可申陳、聽候指揮、豈可擅行誅戮、如殺一副總管、以言語他故加之、則以次將領、凡欲戕害將帥者、何所不可、方今朝廷欲振起中興之業、正當分別是非、明辨曲直、使號令所及、群盜心服、自然不勞兵革、可以底定、今馬友下潰散軍兵、數萬爲群、散漫江湖間、擄掠作過、雖加招撫、徃徃以此爲言、未肯聽從、今來李宏已隨韓世忠軍中前去、伏

望聖慈、特降睿旨、將李宏特正典刑、庶幾四方盜賊、見朝廷紀綱既正、漸次率服、

小帖子

臣契勘李宏、既殺馬友之後、恣其徒黨、盜取官司倉庫、金銀錢米、爲之一空、官吏居民、盡遭劫掠、類皆裸露、其所得財物、盡于岸下、用舟船裝載、意欲遁去、適值韓世忠、前軍統制解元到來、盡皆拘攔入城、又遣人兵、奪門欲出、爲解元殺敗數百人、事方稍定、顯見李宏、圖殺馬友、本非激于忠義、若不正典刑、深慮爲盜賊所窺、上累國體、不細、臣素愚

直輒敢干冒天威、妄有陳述、伏乞聖察、

馬友雖曾爲盜賊、然有敗孔彥舟之功、旣已蒙朝命爲副總管矣、倘其下殺一副總管、便代其位、則何以號令三軍、故必誅李宏而後紀綱正盜賊服矣 李又玄評

乞本司自脩錢本前去廣西出鹽地分計置煎

鹽奏狀

右臣累具奏聞、乞于江西路、隣州撥米五萬石、錢十萬貫、應副本路支用、至今未蒙回降指揮、蓋緣本路連年爲盜賊蹂踐、州縣類皆殘破、百姓屢經科湏、物力匱乏、難以再行敷配、深慮目前闕乏、無以贍給軍兵、招捕盜賊、及到本路、官私空匱、皆如所料、雖多方

擘畫、應副支遣、別無可以措置、理財足用之術、喋喋
仰煩朝廷、方當多事之時、決難逐一指準、應副、竊見
廣西逐年煎造海鹽、元額都計二千一百萬斤、近年
以來、失於措置、煎造不及四分之一、其餘皆是失陷
之數、湖南北路、見今通行廣東鈔鹽、商賈入納搬運、
數目不多、遂致闕食、每斤價例、日漸增長、厚利悉歸
商賈、民間日食貴鹽、見今私販公然行往、寔難禁止、
欲乞朝廷特降指揮、許令臣本司、自備錢本、前去廣
西出產海鹽地分、計置煎鹽、于二千一百萬斤十分
數內、只乞二分之數、計四百二十萬斤、本司自備舟

船脚力般運前來、本路出賣、庶幾鹽價稍平、民不艱食、贏餘之數、可以贍養軍兵、不致仰煩朝廷應副、如朝廷以爲有侵權貨務之利、卽乞依廣東鈔鹽體例、于權貨務入納鈔面錢、卽于鹽法、並不相妨、委是利便、伏望聖慈、特降睿旨、詳酌施行、

廣西未聞有海鹽也故存以備考且以見公措畫兵食之難也
李又玄評

官祠謝表

臣綱言、臣昨任知潭州兼湖南路安撫使、准勅差提舉西京嵩山崇福宮、任便居住者、奉詔令于侯藩、愧無善狀、修香火于琳館、叨沐寬恩、感懼交深、涕泗橫

集中謝伏念臣衰遲孤跡。憂患餘生。蒙起廢于丘壑之間。使收功于桑榆之旦。蕩攘群盜。循撫疲民。黽勉百爲。篋著涓埃之效。積累多釁。終煩搏擊之才。荷聖度之包荒。擴皇明而燭隱。衆毀銷骨。雖貽投杼之嗟。太陽中天。必冀容光之照。解帥閫之重寄。還真祠之舊游。有覲面顏。尚叨廩餼。此蓋伏遇皇帝陛下。躬天錫之勇智。濟國步之艱難。以虞舜好察之心。行成湯克寬之政。致茲罪戾。亦被保全。臣敢不澡雪前非。激昂晚節。遙瞻軒陛。雖無望雲就日之期。自屏山林。益勵愛君憂國之志。

宋李忠定公奏議選卷之九

明

皖桐左光先羅生選

宋——李綱伯紀著

宗人李春熙皞如輯
筠陽戴國士初士較

宗裔李嗣玄評定

陳捍禦賊馬奏狀

紹興四年上

臣竊以偽齊劉豫以虺豕之姿、挾金人虎狼之勢、僭竊名號、盜據舊都、踰五年矣、包藏禍心、久而未發、今者輒敢遣其孽子、率叛將、驅遺民、借助強敵、與之南牧、侵擾淮甸、睥睨江右、雖兵之衆寡、謀之淺深、難以

遙度、然吾之所以捍禦之策、不可不至、恭惟陛下、天
錫勇智、洞照事機、慨然出自英斷、將親總六師、以臨
大江、則翠華所幸、保據形勝、號令諸將、使相應援、信
賞必罰、將士樂從、貔貅之師、百倍其氣、虜之退屈、已
在目中、睿謨克壯、其計得矣、然臣竊謂解雜亂者、不
控拳、救圍者、不搏楫、批亢擣虛、形格勢禁、則自爲解
耳、昔人用兵、多出於此、今僞齊悉兵南下、其境內必
虛、而岳飛新立功于襄漢、其威名已振、亦旣班師屯
于武昌、僞齊必不虞其再至也、陛下倘降明詔、遣岳
飛以全軍、間道疾趨、襄陽、更摘湖南北、驍將銳兵、爲

畫策千里之外
如指諸掌真神
見也

之繼援。命信臣總統。乘此機會。擣潁昌。以臨畿甸。電
發霆擊。出其不意。則僞齊必大震懼。呼還醜類。以自
營救。王師追躡。必有可勝之理。此舉非惟牽制南牧
之兵。亦有恢復中原之兆。此上策也。朝廷或以茲事
甚大。饋餉之費。調發之煩。倉卒未能辨集。則鑾輿駐
蹕江上。勢須號召上流之兵。如岳飛王燮及湖南北
諸將部曲。除留屯外。各摘精銳軍馬。盡集官私舟船。
逐路應副錢糧。命將統率順流而下。旌旗金鼓。千里
相望。以助聲勢。則敵人雖衆。豈敢南渡。仍詔韓世忠
劉光世帥其全師。進屯淮南要害之地。設奇邀擊。絕

其糧道。賊必退遁。保全東南。徐議攻討。此中策也。萬
一借親征之名。爲順動之計。委一二大將。捍敵于後。
則臣恐車駕旣遠。號令不行。諸將無應援協濟之謀。
卒伍有潰散標掠之勢。士氣旣索。人心不固。控扼一
失其守。賊則乘間深入。州縣望風奔潰。其爲吾患有
不可勝言者矣。此最下策也。或謂臣曰。徃歲金人南
渡。以退避得計。今胡爲而不可。臣應之曰。不然。金人
南渡。利在侵掠。旣得子女玉帛。而時方暑。則勢必還
師。朝廷因得收復殘破州縣。還定安集。漸成區宇。故
在當時爲退避之計則可。今爲是役者。僞齊也。使之

渡江而南、必謀割據、得一縣則占一縣、得一州則占一州、得一路則占一路、師不徒還、而姦民潰卒、見利忘義、幸災樂禍者、從而附之、聲勢鴟張、則將何以爲善後之策哉。故在今日爲退避之計、則不可。況僞齊所驅脅而來、皆京東西閩陝之民、非金人比。借有虜騎、勢必不多。朝廷措置得宜、將士用命、則安知此賊非送死于我。昔苻堅以百萬之衆、侵晉、而謝安以偏師破之。顧一時機會、所以應之者如何耳。臣愚伏望聖慈、特降臣章、與二三大臣熟議之。臣自經憂患以來、衰病交攻、志氣凋落、加有重腿之疾、步履艱難、方

國家多事之秋。既不能執干戈以衛社稷。又不獲陪
羈勒而扞牧圉。夙夜憂歎。孤負大恩。死不瞑目。徒有
拳拳之誠。不能自己。故敢以芻蕘之說。上瀆天聽。傳
曰。狂夫之言。聖人擇焉。願陛下無以人廢言。非特臣
之幸也。

此公罷荆湖宣撫。退居長樂時所上也。忠義
激發。千古如見。非特猷猷不忘而已。

獎諭詔書

勅李綱所奏三策。捍禦賊馬。事勢具悉。朕以豫賊
逋誅。敢稱兵而內嚮。金戎助逆。共舉衆以來侵。覆
載靡容。臣民共憤。廼親乘于戎輅。用戡定于邊隅。

卿忠貫神明、慮先著蔡、料敵于千里之外、制勝于
三策之間、既攬囊封、備觀籌畫、見大臣體國之義、
得賢者愛君之誠、心在王室、而無中外之殊、憂以
天下、而以安危自任、忱恂所屬、嘉歎不忘、故茲獎
諭、想宜知悉、冬寒、卿比平安、好遣書、指不多及、

謝表

臣綱言、伏蒙聖恩、以臣所陳三策、捍禦賊馬事、特降
詔書、獎諭者、囊封上奏、冒陳千慮之愚、哀函詔俯頒、
光奉十行之細札、粲若日星之麗、寵踰袞黼之華、祇
荷恩私、深深感涕、中謝竊以逆臣千紀、肆其蛇豕之心、

黠虜怙強、借以虎狼之勢、侵陵淮甸、窺伺江南、六飛
決策以親征。諸將摧鋒而用命。人神助順、輔相協心。
明明廟謨、宜天聲之大振。嘽嘽王旅、將賊黨之盡殲。
而臣夙荷眷勤、嘗陪機政、抱疴負罪、雖遠跡江海之
濱、憂國愛君、每馳心輦轂之下、當天步艱難之日、乃
淵衷開納之秋、敢輸老馬之知、少贊寶龜之用。顧借
筋以靡及、慙料敵之匪工。出位而言、方虞斧鉞之戮。
虛心以聽、亟被絲綸之褒。拜賜甚優、以榮爲懼。此蓋
伏遇皇帝陛下、勇智天錫、聰明日躋、謂光啓于中興、
必削平于大憝、欲恢遠畧、以盡芻蕘之言。故不遐遺。

曲悖簪履之舊。致茲誤寵。驟及匪才。臣敢不仰體睿
慈。益堅素節。謀或可績。儻著稱甲令之忠。知無不言。
願繼塵乙夜之覽。

詢問邊防利害詔書

勅李綱。比以逆臣嘯亂。反易天常。陰導狄人。提兵
南嚮。朕親乘戎輅。號令六師。將士協心。人百其勇。
按甲江上。時出輕兵。所向奏功。俘馘係道。虜勢旣
屈。潛師遯逃。念茲却敵之初。圖爲善後之計。卿以
舊弼。乃心王家。必能爲朕深思熟講。凡今攻戰之
利。守備之宜。措置之方。綏懷之畧。可悉條具來上。

朕將虛已以聽、擇善而從、君臣之間、期于無隱、利害之決、斷以必行、欽佇嘉猷、冀聞確論、故茲詔諭、想宜知悉、春寒、卿比平安、好遣書、指不多及、

謝詢問利害表

臣綱言、伏蒙聖恩、特降詔書、令臣條具邊防利害來上、臣已遵稟、睿諭、具狀奏聞者、十載倦游、屏居海上、數行溫詔、來自日邊、凡清問之下詢、皆一時之急務、恩輝所逮、報稱爲難、謝中竊以詢于芻蕘、帝王之盛德、告以善道、臣子之至情、秦詢黃髮而霸業成、漢屈群策而帝功立、久矣不講、寂然此風、皇帝陛下、慨國步

之多艱。懲前謀之未淑。時乘戎輅。躬總六師。文帝幸
亞夫之營。恩均將士。太宗臨渭水之上。氣讐羗戎。肆
于却敵之初。圖爲善後之策。特頒明詔。俯訪舊人。丁
寧胥訓之辭。若恭承黼座之側。諮諏當世之務。如親
顧草廬之中。詢事考言。遠邁唐虞之舉。畫竒吐策。宜
得平良之臣。而臣曩以非才。嘗叨近輔。學術泥古。識
慮濶疎。憂患薰心。志氣凋落。夫何窾啓寡聞之陋。亦
與詢謀採擇之間。謹已審察事機。條陳利害。亟上皂
囊之奏。冀塵乙夜之觀。竊直不移。僅同汲黯之妄發。
疎通知體。豈效賈生之能言。伏望皇帝陛下。察以至

明容之大度。赦其狂瞽。博招可績之謀。用以設施。大
啓中興之運。則臣繼此有得。敢忘上陳。海嶽深崇。豈
賴涓埃之助。日月清照。常傾葵藿之心。

奉詔條具邊防利害奏狀

紹興五年上時公退
居長樂

右臣伏奉詔書。以僞齊金人賊馬遐遁。令臣深思熟
講。凡今攻戰之利。守脩之宜。措置之方。綏懷之畧。條
具來上。臣仰荷聖恩。憐臣孤跡。嘗備位于近司。察臣
迂愚。有千慮之一得。雖以罪戾。屏伏海濱。曾不遐遺。
以國家邊防恢復大計。特降清問。顧臣學術濶疎。智
識淺短。何足以稱詔旨。而裨廟畧之萬一。敢竭狂瞽。

以塞明命、伏惟陛下留神採擇、臣不勝幸甚、臣竊以
僭逆之臣、挾強悍之虜、提兵南嚮、俶擾淮壖、其意蓋
料朝廷、蹈前日退避之轍、得以乘間渡江、憑陵東南、
不虞六飛親臨江上、號令既行、賞罰既明、將士摧鋒、
俘馘係路、虜氣挫屈、潛師遯逃、此蓋陛下睿謨宏遠、
天威英斷之所致、宗社無疆之休、中外臣子之共慶
也、然臣區區之愚、竊願陛下勿以賊馬遯遁爲可喜、
而以僭逆未誅、仇敵未報爲可憤、勿以保全東南爲
可安、而以中原未復、赤縣神州、猶汙于腥羶爲可恥、
勿以諸將屢捷爲可賀、而以軍政未修、士氣未振、尚

使○狂○寇○得○以○潛○逃○爲○可○虞○則○中○興○之○期○可○指○日○而○俟○
矣○臣○謹○考○往○古○之○跡○揆○方○今○之○宜○條○具○攻○戰○守○備○措○
置○緩○懷○之○策○以○獻○議○者○或○謂○賊○馬○旣○退○當○遂○用○兵○爲○
大○舉○之○計○臣○竊○以○爲○不○然○譬○如○奕○碁○先○當○自○生○乃○可○
殺○敵○生○理○未○固○而○欲○浪○戰○以○僥○倖○此○非○制○勝○之○術○也○
高○祖○先○保○關○中○故○能○東○嚮○與○項○籍○爭○光○武○先○保○河○內○
故○能○出○征○以○降○赤○眉○銅○馬○之○屬○肅○宗○先○保○靈○武○故○能○
破○安○史○而○復○兩○京○今○朝○廷○以○東○南○爲○根○本○倘○不○先○爲○
自○固○之○計○何○以○能○萬○全○勝○敵○又○况○將○士○暴○露○之○久○財○
用○調○度○之○煩○民○力○科○取○之○困○謂○宜○大○爲○守○備○痛○自○料○

理使之蘇息。乃爲得計。議者又謂賊馬旣退。當自保據一隅。以苟目前之安。臣又以爲不然。譬如奕碁。捨局心而就邊角。迫蹙偏小。浸以衰微。何以取勝。秦師伐晉。以報殽之師。諸葛亮佐蜀。連年出師。以圖中原。不如是不足以立國。高祖在漢中。謂蕭何曰。吾亦欲東耳。安能鬱鬱久居此乎。光武破隗囂。詔岑彭曰。人苦不知足。旣平隴。復望蜀。此皆帝王以天下爲度者也。不如是不足以混一區宇。戡定禍亂。又况祖宗之境土。豈可坐視淪陷。不務恢復。今歲不征。明年不戰。使賊勢益張。而吾之所糾合精銳士馬。日以損耗。何

以圖敵。謂宜于防守既固。軍政既修之後。卽議攻討。乃爲得計。此二者守備攻戰之序也。至于守備之宜。則當料理淮南荆襄。以爲藩籬。夫淮南荆襄者。東南之屏蔽也。六朝之所以能保有江右者。以強兵巨鎮。盡在淮南荆襄間。故以魏武之雄。符堅石勒之衆。宇文拓拔之盛。卒不能窺江表。後唐李氏有淮南。則可以都金陵。其後淮南爲周世宗所取。遂以削弱。今朝廷欲爲守備。則當于淮南東西及荆襄置三大帥。屯重兵以臨之。東路以楊州。西路以廬州。荆襄以襄陽爲帥府。分遣偏師。進守支郡。小築城壘。如開新邊。其

初朝廷應副錢糧。如淮東則以江東路財用給之。淮
西則以江西路財用給之。荆襄則以湖南北路財用
給之。徐議營田。使自贍養。遇有賊馬。則大帥遣兵應
援。稍能自守。商旅必通。乃可召人歸業。漸次葺理。假
以歲月。則藩籬成矣。前有藩籬之固。後有長江之險。
加以戰艦水軍。使沿江一帶帥府要郡。上連下接。自
爲防守。賊馬雖多。豈敢輕犯。近年以來。大將握重兵
于江南。官吏守空城于江北。雖有天險。初無戰艦水
軍之制。故敵人得以侵擾窺伺。欲爲守備。無他反此
而已。或謂三大帥率重兵以屯江北。則供億之費不

賞。臣應之曰。使三大帥屯兵于江南。亦仰給于朝廷。其費等耳。曷若使之渡江。葺理淮南。以爲家計。則朝廷異時可省經費。而藩籬之勢。成爲無窮之利。守備之宜。莫大于是。有守備矣。然後可以議攻戰之利。亦當分責于諸路大帥。謂如淮東之帥。則當責以收復京東東路。淮西之帥。則當責以收復京東西路。荆襄之帥。則當責以收復京西南北路。川陝之帥。則當責以收復陝西五路。諸路尅捷。因利乘便。收京畿。復故都。以戡大憝。此雖落落難合。然在陛下志先定于中。而斷以至誠必爲之意。蓋無不可成之理。至于擇將。

之術。治兵之政。車馬器械之制。號令賞罰之權。兵家皆有常法。無待臣言。而戰陣之間。因敵決勝。臨事制變者。兵無常形。又不可以預圖也。臣願竊以爲獻者。在勿失機會而已。夫機會之來。間不容髮。以戰則勝。以守則固。一失其機。悔不可追。昔劉表悔不用蜀先主之言。蜀先主曰。天下日尋干戈。事會之來。豈有終極。若能應之于後。則此未足爲恨也。臣竊觀朝廷近年以來。失機會者多矣。自今以往。如能保淮南荆襄以爲固。選將練卒。厲兵秣馬。聚財積穀。應機而作。則以弱爲強。取威定亂于一勝之間。僭逆之臣。可正藁

街之誅。強悍之虜。豈無殄滅之日。攻戰之利。莫大于
是。此二者。守備攻戰之策也。若夫措置之方。則臣願
先定駐蹕之所。蓋萬乘所居。必擇形勝。然後能制服
中外。以圖事業。臨安平江。皆澤國。褊迫。偏霸所據。非
用武之地。惟建康自昔號爲帝王天子之宅。以其江
山雄壯。地勢寬博。可容萬乘。故六朝以來。更都之。今
鑾輿未復舊都。莫若權宜。且於建康駐蹕。控引二浙。
襟帶江湖。運漕財穀。無不便利。臣昨于建炎初。建議
巡幸。閔中爲上。襄陽次之。建康爲下者。以天下形勢。
言之也。今以建康爲便者。以東南形勢言之也。然淮

南有藩籬之固。然後建康可都。願陛下與二三大臣
熟計之。既料理淮南。仍詔建康守臣。治城壁。修宮闕。
立官府。創營房。使粗成規摹。以待翠華之幸。近年以
來。車駕所過。因陋就簡。諸事草創。雖陛下以時方艱
難。用過于儉。然宮室制度。亦有不可已者。有城壁。然
後人心不恐。有官府。然後政事可修。有營房。然後士
卒可用。惟自朝廷應副。詔有司以漸修建。庶幾不擾。
此措置之方。所當先者也。綏懷之畧。則臣願先爲自
強之計。夫西北之民。皆陛下之赤子。荷祖宗涵養之
德。其意曷嘗一日忘宋哉。特制于黠虜之勢。爲所驅

迫陷于塗炭。故捨二百年之本朝。而事大不道之僭
逆。豈其本心。惟朝廷之力。未能保覆之。故數路之民
雖困於重斂。傷於峻刑。而不能以自歸。倘淮南荆襄
藩籬既成。壤地相接。甲兵既備。天威震驚。必有結約
來歸。如宿遷之民者。必有願爲內應。如京東郡縣者。
宜命諸帥。優加拊循。來歸者。給田土。內應者。予爵賞。
官吏將士。祿秩由舊。許之自新。孰不感悅。朝廷近者
得諸路簽軍。皆不殺而優恤之。自賊中來歸者。皆優
與官秩。可謂得策。更願力爲自治自疆之計。使陷溺
之民。知所依怙。益堅戴宋之心。此綏懷之畧。所當先

者也。攻戰守備。措置綏懷。皆中興之至計。今日之急務。聖問所及。臣已粗陳其梗槩矣。臣伏讀詔書有曰。朕將虛已以聽。擇善而從。君臣之間。期于無隱。利害之決。斷以必行。臣三復聖訓。不知涕泗之交頤也。何則。君臣之遇。千載一時。未信而言。則有謗已之嫌。交踈言深。則有失身之戒。今陛下求治之切。詔書如此。而臣以憂患之餘。孤危特甚。欲淺言之。則何以副陛下期於無隱之訓。欲深言之。則慮有犯顏逆鱗之愆。感懼交中。進退維谷。雖然。陛下當艱危多故之秋。詔臣以丁寧惻怛之意。緘默不言。臣則有罪。有君如此。

其忍負之。敢冒鼎鑊刀鋸之誅。以布心腹腎腸之寔。惟陛下幸察。臣竊觀陛下有聰明睿智之姿。有英武敢爲之志。然自臨御。迄今九年。國不闢而日蹙。事不立而日壞。將驕而難御。卒惰而未練。國用匱而無贏。餘之蓄。民力困而無休息之期。陛下憂勤雖至。而未足以成中興之業者。則群臣誤陛下之故也。陛下自近年以來。所用之臣。凡幾人。慨然敢任天下之重。建事立功。與夫充位備員者。皆不逃於聖鑒。夫用人如用醫。必先知其術業。可以已病。然後使之進藥。而責成功。今于醫者之術業。初不詳究。而姑試之。則雖日

可為法
歎

易一醫。何補。病者。殆將飲藥以加病而已。平居無事。小。庶。曲。謹。初。似。無。過。而。乏。濟。時。之。大。畧。忽。有。擾。攘。之。故。則。錯。愕。無。所。措。手。足。不。過。奉。身。以。退。天。下。憂。危。之。重。委。之。陛。下。而。已。不。知。何。補。于。國。家。陛。下。亦。安。取。此。大。槩。近。年。所。操。之。說。有。二。閑。暇。則。以。和。議。為。得。計。而。以。治。兵。為。失。策。倉。卒。則。以。退。避。為。愛。君。而。以。進。禦。為。誤。國。衆。口。和。之。牢。不。可。破。然。累。年。之。間。冠。蓋。相。望。而。初。不。得。其。要。領。翠。華。蒙。塵。而。尚。未。有。所。定。居。上。下。苟。且。偷。安。而。不。為。長。久。之。計。天。步。艱。難。國。勢。益。弱。職。此。之。由。大。運。有。開。天。啓。宸。衷。超。然。遠。覽。悟。前。日。和。議。之。

失而親總六師。懲前日退避之非。而親臨大敵。逆臣
悍虜數十萬衆。飲馬江干。雖未能掃蕩邀擊。盡殲醜
類。而天威所臨。已足以使之震怖。不敢南渡。潛師宵
奔。則和議之與治兵。退避之與進禦。其效槩可觀矣。
今賊馬雖退。而虜情狡獪。變詐百出。未大懲創。疆場
相望。道理不遠。安知其秋高馬肥。不再來擾我。使疲
于奔命哉。是宜明詔于却敵之初。求善後之策也。臣
夙夜爲陛下深思。所以爲善後之策者。無他在。盡反
前日之所爲。解琴瑟而更張之。先定其論。如奕棋之
立意。後圖其功。如奕棋之置子。必可得志。臣請試陳

其說竊觀自古創業中興之主必以兵勝而爲親征
之計者其意豈謂必冒矢石履行陣而後可哉黃屋
所臨人心自固賞罰旣當士氣奮張用能成功故高
祖旣得天下擊韓王信陳豨黥布未嘗不親行光武
自卽位至平公孫述十三年間無一歲不親征本朝
藝祖太宗定維揚平澤潞下河東皆躬御戎輅真廟
亦有澶淵之行措天下于大安此所謂始于勤勞終
于逸樂者也退避之策可暫而不可久可一而不可
再退一步則失一步退一尺則失一尺往時自南都
退而至于維揚則關陝河北河東失矣自維揚退而

至于江浙則京東西失矣。萬有一虜騎南牧。復將退避。不知何所適而可。航海之策。萬乘冒風濤不測之險。此尤不可者。惟當于國家閑暇之時。明政刑。治軍旅。選將帥。修車馬。備器械。峙糗糧。積金帛。賊來則禦。俟時而奮。以光復祖宗之大業。此最上策。杜牧所謂上策莫如自治也。臣願陛下自今以往。勿復爲退避之計可乎。臣又觀古者敵國善隣。則有和親。仇讐之邦。鮮復遣使。豈不以釁隙旣深。終無講好修睦之理故耶。東晉渡江。石勒遣使于晉。元帝命焚其幣。而却其使。彼遣使來。且猶却之。此何可往。假道于僭僞之

後日而
出便成
至議論
大文章

國而自取辱。無補于事。祇傷國體。金人自知罪惡之
重。懼我必報。其措意爲如何。而我方且卑辭重幣。屈
體以求之。其不推誠以見信決矣。噐幣禮物。所費不
貲。使輶往來。坐索士氣。而又邀我以必不可從之事。
制我以必不敢爲之謀。是和卒不成。而徒爲此擾擾
也。非特如此。于吾自治自彊之計。動輒相妨。實有所
害。金人二十餘年。以此策破契丹。困中國。而終莫之
悟。夫辯是非。利害者。人心所同。豈真不悟哉。聊復用
此。以僥倖萬一。曾不知爲吾害者甚大。此古人所謂
幾何僥倖而不喪人之國者也。臣願陛下自今以往。

勿復遣和議之使可乎。此二說者既定。然後擇所當爲者。一切以至誠之意爲之。先後本末。各有次第。俟吾之政事修。倉廩實。府庫充。器用備。士氣振。力可有爲。乃議大舉。則兵雖未交。而勝負之勢已決矣。抑臣聞朝廷者根本也。藩方者枝葉也。根本固則枝葉繁。朝廷者腹心也。將士者爪牙也。腹心吐則爪牙奮。今國家遠有盛強之黠虜。近有僭僞之逆臣。所仰以爲捍蔽者。在藩方。所資以致攻討者。在將士。然根本腹心。則在朝廷。惟陛下正心以正朝廷。正朝廷以正百官。使君子小人各得其分。則是非旣明。賞罰必當。自

然藩方協力將士用命強虜不足畏逆臣不足憂此特在陛下方寸之間耳臣昧死條上六事一曰信任輔弼二曰公選人材三曰變革士風四曰愛惜日力五曰務盡人事六曰寅畏天戒何謂信任輔弼夫撥亂之主履時艱難資輔弼之臣同心同德相與有爲必如元首股肱之於一身父子兄弟之於一家乃能協濟故高祖視蕭何如左右手太宗遇房杜如子弟蜀先主得諸葛孔明如魚之有水不如是不能感會風雲以成王霸之業今陛下選于衆以圖任遂能捍禦大敵可謂得人矣然臣願陛下待以至誠無事形

迹。久。任。以。責。成。功。勿。使。小。人。得。以。間。之。則。君。臣。之。美。
垂。裕。無。窮。昔。高。祖。終。始。用。蕭。何。太。宗。終。始。用。房。杜。故。
能。戡。亂。定。功。卒。致。太。平。管。仲。有。言。曰。知。人。而。不。能。用。
害。霸。也。用。而。不。能。信。任。之。害。霸。也。信。任。而。使。小。人。參。
之。害。霸。也。霸。者。猶。如。此。而。況。于。欲。恢。復。天。下。者。乎。魏。
鄭。公。有。言。曰。君。臣。同。心。是。謂。一。體。豈。有。置。至。公。事。形。
迹。若。上。下。共。由。茲。路。邦。之。興。喪。未。可。知。也。夫。事。形。迹。
者。未。必。有。過。舉。而。魏。公。以。爲。興。喪。未。可。知。者。凡。以。無。
至。誠。相。與。之。意。而。惟。嫌。疑。之。爲。避。不。足。建。興。邦。之。大。
績。故。也。陛。下。誠。能。推。信。任。之。誠。臣。將。見。輔。弼。任。責。而。

中興之業。不難致矣。何謂公選人材。夫治天下者。未嘗不資于人材。而創業中興之主。所資爲尤多。何則。繼體守文。率由舊章。得中庸之才。亦足共治。至于艱難有爲。興衰撥亂。則非得卓犖瑰偉之材。未易有濟。故武王之有十亂。宣王之有吉甫方叔召虎。高祖之有三傑。光武之有鄧禹耿弇吳漢之屬。太宗之有房杜英衛之流。憲宗之有裴度。武宗有李德裕。皆以不世出之材。佐大有爲之主。參翊佐佑。以成大業。古今通道。其可忽諸。然自昔抱不群之材者。多爲小人之所忌嫉。或中之以黥闇。或指之爲黨與。或誣之以大

李忠定公明
三自任昏主
何不悟也

惡。或摘之以細故。而以道事君者。不可則止。難于自。
進。耻于自明。雖負重謗。遭深譴。安于義命。不復自辯。
惟至明之主。爲能悉小人之情僞。而辯其臣之非辜。
此霍光所以見察于昭帝。房喬所以見信于太宗也。
陛下臨御以來。用人材多矣。世之所許以爲正人端。
士者。往往闕廢于無用之地。豈非懼此謗耶。遂使陛。
下寤寐側席。而有乏材之歎。懷材抱義。願爲國家宣。
力者。無因而進前。陛下盍亦少留聖意。致察于此。洪。
範皇極之疇曰。無有作好。遵王之道。無有作惡。遵王。
之路。無偏無黨。王道蕩蕩。無黨無偏。王道平平。好惡。

偏黨。皆足以爲至公之累。惟以道爲公。而無好惡偏黨之私。則王道明矣。魏鄭公卒。太宗遣人至其家。得書半藁。其可識者曰。天下之事。有善有惡。任善人則國安。用惡人則國弊。公卿之內。情有愛憎。憎者惟見其惡。愛者止見其善。愛憎之間。所宜詳審。若愛而知其惡。憎而知其善。去邪勿疑。任賢勿猜。則可以興矣。太宗感悟。夫人主豈能無愛憎。然必去愛憎。而後得人以興者。愛憎出于私情。用人以興邦。必由于公道。故也。管仲雖仇。齊公必用。雍齒雖怨。漢祖必賞。而況其餘乎。陛下誠能推至公之道。臣將見人材輩出。中

興之業。不難致矣。何謂變革士風。夫用兵之際。似與士風。初不相及。然其寔相爲表裏者也。士風淳厚。則議論正。而是非明。朝廷賞罰功罪當。而人心服。此措置所以得宜。而寔明寔昌也。士風澆薄。則議論不正。是非不明。朝廷賞罰功罪不當。而人心不服。此措置所以失宜。而寔微寔弱也。晉之士風。尚虛浮而不事事故。當時措置乖謬。盜賊並起。而有五戎亂華之禍。本朝嘉祐治平以前。士風何其淳厚也。自數十年來。非特不事事而已。奔競爭進。議論徇私。邪說利。凡足以惑人主之聽。元祐大臣。如司馬光之流。皆持正論。

爲朝廷長慮。却顧圖久遠之計。社稷之臣也。而群枉
嫉之。指爲姦黨。聽其言則大者可族。小者可誅。賴國
家寬仁。祇從竄逐。其士風迥相倣效。顛倒是非。變亂
白黑。政事大壞。以馴致靖康之變。非偶然也。殆今四
十餘年。世變風移。愛憎之情銷盡。然後朝廷始知元
祐群臣之忠。褻贈官秩。錄用子孫。然已何補於事。曷
若早變此風。則忠臣無誅謫之冤。國家有治安之寔。
兩受其利。豈不美哉。臣觀近年士風。尤薄。隨時好惡。
以取世資。不顧國體。惟欲進身。不覈事寔。惟欲傷人。
大罪則大進。小詆則小遷。譎訛成風。此非朝廷之福。

也。陛下得一張浚。付以重權。使禦強敵于閑陝。浚雖以忠許國。而事失機會。不爲無過。言者痛繩醜詆。誣以大惡。豈不太甚歟。浚有浴日之功。足以結陛下之知。有大臣之辯。足以回陛下之聽。故得自洗濯。復侍清光于帷幄之中。然其所傷已多矣。藉使遭謗困讒之臣。無浚之功。又無大臣爲之辯白。而有下石以擠之者。則何以自雪于君父。冀察其不然哉。夫朝廷設耳目。及獻納論思之官。以廣視聽。固許之以風聞。至于大故。亦須覈寔。使果如其言。則誅責所加。豈宜止從輕典。使言而無寔。則誣人之罪。伏讒蒐慝。得以中

害善良。皆非所以修政也。臣願陛下降明詔。以戒諭士大夫。使體德意。從忠厚。變近年澆薄之風。昔賈誼勸文帝養人臣以禮義。庶耻。陸贄勸德宗聽言必考其寔而察其情。以正典刑。不宜兩置而不問。皆治道之要。陛下誠能行責寔之政。臣將見士風淳厚。而中興之業不難致矣。何謂愛惜日力。臣聞之周書曰。功崇惟志。業廣惟勤。蓋功以志崇。所以爲之規摹也。業以勤廣。所以爲之積累也。猶建大廈。堂室室與序。其規摹可一日而成。至于鳩工聚材。積累非一日所致。創業中興。何以異此。高祖得韓信。與之論亡楚之策。光

武得鄧禹與之論興漢之謀。蜀先主得諸葛亮與論
鼎立之計。皆定于談笑之間。而高祖以五年成帝業。
光武以十三年混區宇。先主得蜀。亦在數年之後。蓋
積累而致者如此。今陛下臨御九年。于茲境土未復。
僭逆未誅。仇敵未報。尚稽中興之業。則其始不爲之
規摹。其後不爲之積累。故也。邊事粗定之時。朝廷所
推行者。皆簿書期會。不急之細務。至于攻討防守之
策。國之大計。皆未嘗留意。安得不爲僭逆之臣。強悍
之虜之所窺伺。然則自今以往。其可不惜日力哉。昔
禹不貴尺璧。而惜寸陰。今日朝廷艱難。乃惜分陰之

時。臣願陛下詔二三大臣。熟議所以規摹者。凡所施
爲。畫一條具。如立課程。以次施行。又詔州縣。使體陛
下德意而奉行之。所立期限。勿太遽。以致搔擾。勿太
緩。以失機會。使事得其序。不擾而辦。乃爲得策。夫天
下無不可爲之事。亦無不可爲之時。惟失其時。則患
之。小者。日益大。事之易者。日益難。正如醫者之治病。
其在皮膚。針烙及之。其在五臟。湯劑及之。至于骨髓。
則雖有扁鵲。愈蚘。蔑以爲矣。此時之所以不可失也。
陛下誠能存愛日之心。將見爲無不成。中興之業。不
難致矣。何謂務盡人事。臣竊觀天人之道。其寔一致。

人之所爲。卽天之所爲也。國之將興。百度皆舉。天寔佑之。猶之農夫盡其穠蓂之力。乃亦有秋。使未嘗致耕耨之勤。而欲望稼穡之利。其可得耶。天不人不因。人不天不成。人事盡于前。則天理應于後。自然之符也。光武以兵三千。攻尋邑百萬者人也。適雷電風雨。遂有昆陽之勝。而中興之運啓者天也。孫權以兵三萬。拒曹操數十萬者人也。適風順可以縱火。遂有赤壁之捷。而鼎足之勢成者天也。謝安以兵八千。擊苻堅百萬者人也。適秦師小却。遂有淝水之功。而東晉之祚延者天也。創業中興之主。莫不皆然。盡其在我。

者。而以其成功歸之于天。孟子曰。君子創業垂統。爲可繼也。若夫成功則天也。今未嘗盡人事。敵至則先自還屈。而欲責成功于天。其可乎。臣願陛下詔二三大臣。協心同力。務盡人事。以聽天命。則恢復土宇。翦屠鯨鯢。迎還兩宮。必有日矣。夫人心卽天心也。下得人心。上合天心。則無不成之功。陛下誠能和同天人之際。臣將見中興之業。不難致矣。何謂寅畏天戒。夫天之于王者。如父母之于子。愛之至。則所以爲之戒者亦至。是以孔子作春秋。于災害必書。以謹天戒。臣觀商之盛。如武丁。周之盛。如成王。漢唐之盛。如文景。

太宗之時。未嘗無天變。而不爲災者。以能寅畏其戒。而仰合其心也。是知人主之于天戒。必恐懼修省。以致其寅畏之誠。則能變災以爲祥。天人之際。何其昭昭然也。比年以來。熒惑失次。太白晝見。地震水溢。或久陰不雨。或久雨不霽。或當暑而反寒。乃正月之朔。日有食之。此皆天意眷佑陛下。丁寧反覆。以致告戒。陛下雖嘗降詔。俾士大夫各修厥職。以答天譴。然臣竊謂應天以寔。不以文。此在陛下。以至誠之意。正厥事。以應之。昔宋公一言。而妖星退舍。大戊桑穀共生。于朝而反以爲祥。陛下誠能行應天之寔。臣將見百

祥來止。中興之業不難致矣。此六者皆陛下所當先務。正心以正朝廷者。故糞土愚臣忘生觸死。爲陛下詳言之。抑臣又聞聖人不畏多難。而畏無難。或多難以固其國。啓其疆土。或無難以喪其國。失其土宇者。少康以一旅之衆。而祀夏配天。不失舊物。光武太宗皆躬擐甲冑。履危險。而身致太平。享國長久。今朝廷人材不乏。將士足用。江淮荆浙。閩廣川陝。財用可理。足以爲中興之資。陛下勇智天錫。春秋鼎盛。欲大有爲。何施不可。要在改前日之轍。斷而行之耳。昔仲虺之稱湯。不稱其無過。而稱其改過不吝。蓋帝王之度。

如天地之無心。是則行。非則改。何憚之有。酈食其勸高祖鑄印。以封六國之後。子房一言則趣銷之。封德彝勸太宗用刑法以威天下。魏鄭公一言則行仁義。遂致正觀之治。無損盛德。而大功可成。豈竊竊然畏人之議已哉。陛下視建炎以來。其所措置。是耶非耶。以爲是則何以不見其效。以爲非則安可復蹈其轍。臣前所陳。皆改轍之道。非循舊跡所能爲也。擇善而從。斟酌而行。則在陛下。夫以祖宗二百年之基。四海億兆之生靈。皆繫於陛下。清燕之間。聖慮及此。得不慄慄危懼。勉勉自強。上以慰祖宗在天之靈。下以副

四海生靈之望哉。昔周宣中興。南征北伐之威。復古
接下之美。詠于小雅。蓋有文武之吉甫。顯允之方叔。
以爲之將帥。有孝友張仲。以在其左右。故能內修政
事。外攘夷狄。復文武之境土。然則陛下所當法者。深
考周宣之詩。則得之矣。所謂善後之策。何以加此。臣
以至愚極陋之質。荷陛下非常特達之知。龍飛之初。
虛席以待。眷遇之禮。邁于等倫。特以志廣材疎。自度
不足以任天下之責。力丐罷政。無補國事。每自愧惕。
違去闕庭。九更寒暑。犬馬之心。何嘗一日不在赤墀
之下。自以罪戾遠屏。不敢復與世故。芻蕘之言。久不

上達。近者邊報警急。戎輅親臨。臣子之情。不勝憤懣。故敢冒昧以三策爲獻。伏蒙聖慈。特降詔書。獎諭。今者又奉詔旨。咨以當世之務。而臣不量荒淺。冒進狂瞽之說。以瀆天聰。昔太宗謂魏鄭公爲敢言。謝曰。陛下導臣使言。不然。其敢數批逆鱗哉。今陛下盛德過于太宗。臣雖無魏公之敢言。然展盡底蘊。亦思慮之所極也。良藥苦口而利于病。忠言逆耳而利于行。在陛下察之而已。况臣自經憂患。衰病交攻。氣息奄奄。日與死迫。常懼先犬馬填溝壑。無以報盛德之萬一。今得奉明問。據至情。臣願足矣。雖死之日。猶生之年。

也。伏望陛下哀憐。赦其愚直。而取其拳拳之忠。寔天下之幸。

高宗之安於和議而不思報復者其氣奪固也。而其最受病處尤在志足其志足者何也。帝故康王也。天下非有變人臣耳。今雖稱臣金。然猶人主也。雖失中原。然猶有天下半也。彼重視其所有而恐失之者。足于其所有者也。且以其所不得者。非其所素有者也。倖而一捷。益沾沾矣。志益盈。氣益索矣。忠定深有見于此。故未論其所以攻戰守備措置。後懷之畧。而先奪其可喜可賀者。而激其可憤可耻。可虞者。蓋欲高宗志先定于中。而斷以至誠必爲之意。則事無不成之理也。惟其志不定。則閑暇以和議爲得計。倉卒以退避爲愛君。于是自南都退而至維揚。自維揚退而至江浙。未已也。卽明州汎海而不以爲勞。于是祈哀于仇讐之虜。假道于僭逆之臣。未已。

也卽受其詔諭江南之名而不以爲愧此豈
其心人後恬不知耻者哉彼彼固謂寤寐側席
有乏材之歎不知懷材抱義願爲國家宣力
如忠定者又困于讒口耻于自明無因而復
進此忠定所謂中興用兵止是一事其要在
明賞罰別是非使君子小人各得其分而後
強虜不足畏逆臣不足憂嗚呼其可謂知言
也已公每奏惓惓以不失機會爲言機會失
則患之小者日益大事之易者日益難自靖
康顛覆以來其真可以恢復者獨此時耳有
將相如忠定武穆可以恢復而不使之復又
使之必不復坐失機會自取陵夷嗚呼此元
美氏之所以深惡痛恨
于高宗也

李又玄評

